



Musk indang political party
ya temenüntsü mapa

Boxing : Ricky Hatton
tanaben asayashitsü

NH-29 nung tetsüng trok aliba khu abenba gari senzütsü melar

Dimapur, Chiteni/July 07 (TYO): KMC jana indokba tesem tejenba nung lenmang tamajungba akumba aser toll tax gate tejenba (Welcome to Kohima Gate) anasa alinen tanen makai aliba ajanga National Highway-29 nung iba tesem nung six-wheeler goods carrier

trucks kisüng senzütsü melar, ta Deputy Commissioner, Kohima, B. Henok Buchem-i sandong ka nung ashi.

Ibai nüburtem kumzüka ayutsü mechi nokdang aser tarutsü nung sangdong ka magütsü tashi shibanga alitsü, ta sangdong ajangasa ashi.

Moscow nung Bharat Utsav nung Nagaland nungi shilem agir

Dimapur, Chiteni/July 07 (TYO): Russia yimtiba Moscow nung aliba Manezhnaya Square nung July 5-13, 2025 anogotem agiba Bharat Utsav - Festival of India nung Nagaland nungia shilem agitar. Iba benjong ya Moscow nung aliba Indian embassy ajanga Moscow City Government teyari nung ayongzüik, koba India indang sobaliba aser alima sapang nung entrepreneurial yimya ainba benjongtsü nükjidong nung ayongzüikba lir.

Nagaland delegation nungya Chief Minister Dr. Neiphiu Rio, Advisor to the Chief Minister and Chairman IDAN, Abu Metha, aser MLA and Advisor for Industries & Commerce, Hekani

Jakhalu aser state department balala nungi ketdangsürtema adentsü imlar.

State nungi iba benjongmung nung shilem agirtem den Department of Industries & Commerce, Government of Nagaland ajanga amalitep akar.

Teshimtet entrepreneurs telok ka meina aoba nung Director, Industries & Commerce, P. Tokugha Sema aser ano ketdangsürtem dena lir.

Iba tesem nung Nagaland stall temeja ka amenoka Naga nungeri yanglutetba osettsüset balala sayur. Iba den külemi Task Force for Music & Arts (TaFMA) ajanga Nagaland nungi cultural troupe ka yoka lir aser parmoki sobaliba ken aser tsüngsang sayur.

NITI Aayog-i NER District SDG Index (2023-24) tanabuba edition sayaogo

Dimapur, Chiteni/July 07 (TYO): North Eastern Region (NER) District Sustainable Development Goals (SDG) Index Report (2023-24) indang edition tanabuba tanü NITI Aayog ajanga sayaogo.

Iba Index ya NITI Aayog aser Ministry of Development of North Eastern Region (MoDoNER) ajanga UNDP nungi technical teyari nung renem. Iba Index ya August 26, 2021 nung mezüng edition sayaba nung ajemdaker North Eastern States ti nung aliba district tem nung SDGs asadanga lir.

Iba Index yagi loktiliba, rongsenketzüng aser libajen terenlok nung tetsükdaktsü ajuruba ajangettetsüsa asoshi inyakba sayur.

District 121 nungi composite scores ya Longding, Arunachal Pradesh nung 58.71 nungi Hnahthial, Mizoram nung 81.43 tashi telemsa lir. District tem category pezü lemsa - i) Achiever: Score equals 100 (achieved the targets set for identified indicators); ii) Front Runner: Score between 65 and 99 (excluding 100); iii) Performer: Score between 50 and 65 (excluding 65); and iv) Aspirant: Score less than 50.

Mizoram, Sikkim aser Tripura nung aliba districts ajungai Front Runner jenjang tongtet aser districtkata Aspirant mesüra Achiever categories küboki mait.

Northeast region nungi Mizoram nung highest scoring district (Hnahthial at 81.43) lir aser Arunachal Pradesh nung lowest-scoring district (Longding at 58.71) lir.

State shia Highest aser Lowest Scores Districts tem yamai alitsü:

Arunachal Pradesh: Lower Dibang Valley (73.36) to Longding (58.71)

Assam: Dibrugarh (74.29),

South Salmara-Mankachar (59.71)

Manipur: Imphal West (73.21), Pherzawl (59.71)

Meghalaya: East Khasi Hills (73.00), East Jaintia Hills (63.00)

Mizoram: Hnahthial (81.43), Lawngtlai (67.71)

Nagaland: Mokokchung (78.43), Zunheboto (63.36)

Sikkim: Gangtok (76.64), Gyalshing (71.14)

Tripura: Gomati (78.79), Dhalai (72.29)

NER District SDG Index 2023-24 ya kuli tejangia nung ajemdaker sentong yanglutsü, senotsü lemozütsütsü aser terenlok mapa mita anepalutsü asoshi tongtipang hadir ka lir.

Tsüngsang-mopung ajanga Nagaland tesem balala nung nüburtem timtemer



Deputy Commissioner, Dimapur, Dr. Tinojongshi Chang, NCS den DDMA züngsem temi July 7, 2025 nü tzümtsüng agi kongshir aliba colony tem nung teyari sen agütsüba mapang tangokba noksa nung angur.

Kohima, Chiteni/July 07 (TYO): Tsüngsang-mopung majungba ajanga state tesem ajungalen teraksatsüba jenti lir, ta Nagaland State Disaster Management Authority (NSDMA) sangdong ka ajanga ashi.

Commissioner and Secretary, NSDMA, Lhouchalie Viya-i sangdong ka nung ki, lenmang, apu, lenmang tezülen jara, tzülu aser tekong lu raksaba osangtem lir, ta ashi.

Dimapur nung SM Colony, Ragailong colony, Super Market, K Sachu colony, Walford colony aser Model colony Purana Bazaar amala colony balala nung tzümtsüngba osang lir, ta ashi.

Chümoukedima district nunga Tenyiphe village, Chekiye village, Ward 10 near DC office, Khopanala village, Sovima village, 173rd CRPF Camp beside Dimapur Airport, Thilixu village aser Niuland district kübok Kuhuboto village, New Showuba aser Naga United village nung tzümtsüng adokba osang lir.

Kohima nung Civil Secretariat tsünglanglen retaining wall ka laoa gari ana raksa aser office kar lenmang nokdanga liasü. Jila tesem kar nung tzü atzüngba osanga lir.

July 4, 2025 nü Yongam

village nung alinen aluba ajanga Mon aser Longleng district sendaktepba lenmang rakdangogo, ta NSDMA ajanga ashi.

Wokha district kübok Chanka village nung ajungben tzümtsüng alua alu raksatsü.

Mokokchung district nunga Changki village nung alinen alua lenmang tongtipa den tzü pipeline raksaja lir. Longkong village nunga alinen aluba osang lir.

Tuensang district nunga Chare Town nung alinen alua National Highway 202 anenzüka ogo.

DDMA Tuensang ajanga senzüsempongertem mesüra shirangertem Chare nungi Tuensang-i belenba nung yaritepa liasü, ta Viya-sa ashi.

Tesem balala nung alinen alua Chare aser Mokokchung district sendaktepba lenmang shibanga lir aser ayong nung tzü kanga sashia ayimba ajanga Chare-Mokokchung tsüngta apu ka telaor lir, ta paisa ashi.

DDMA Dimapur aser HG, CD & SDRF ajanga teyari agütsütsü asoshi Walford area nung aliba BSNL quarters, S.M colony aser Namgalong colony nung relief camps asem amenoka lir aser timtem nung alirtem bushia kumzüikba mapa inyaker.

Tang item relief camps nung tanur, tain, shiranger, special child, kinü tanur densema nisung 844 kumzüka yua lir. District administration-i DDMA aser State Disaster Response Force (SDRF) den yaritepa manen tzü-metzüng tensa asadangatar.

Deobarnep nungi tenzüka rescue operations agitar aser iba mapang Mount View Colony Purana Bazaar 'B', Kuda village, Namgalong colony, Vilhume colony, Aoyimti village, Police colony, Ekhyoyan Village, Walford (central) colony, Netaji colony, Phom colony ama tzümtsüng agi tesashiba kongshia aliba tesemtem nung rangloker tekumzüikba aser teyari agütsüba maparen balala inyakter.

SDRF team-i rescue boat ka aser personnel 25 yoka tzü agi mubanga aliba ki aser yimtung nungi mainshiteti aliba nisungtem kumzüka liasü.

Anogo ishika tzünglu aruba ajanga Dimapur tesem balala nung tzümtsüng adokba dak sendakba nung nisung asüba asem (tebur ana aser tetsür ka) ajurua lir. Tebur ana ya Deobarnep Kuda village, Nagarjan nung light agi puseta asü aser tetsür ka ya Police colony nung tzümtsüng atuba mechi inverter agizükdang puseta asü.

NE lanur 50,000 nem maritime skill training agütsütsü: Sonowal

Guwahati, Chiteni/July 07 (Agencies): Küm ter tsüngta sorkari Northeast region nungi lanur 50,000 nem maritime skills nung training agütsütsü nükjidong lir, koba ajanga sector balala nung employment agütsütsü lir, ta Union Minister of Ports, Shipping & Waterways, Sarbananda Sonowal-i Hombarnü ashi.

Guwahati nung Maritime Skill Development Centre (MSDC) aser Dibrugarh nung Centre of Excellence (CoE) lapoktsü aliba nükjidong ya iba temelenshi asoshi lir. CoE ya sen 200 crores indoka yanglutsü aser centres anaprongi küm shia

mapa 500 adokdaktsütsü.

"Yuva Shakti ajanga linük nung asangsang temelenshi bener arutsütsü asoshi PM Modi mangdang lir. Asen mangdang ya Northeast nungi lanir 50,000 nem küm ter tsüngta world-clas mamritime skills nung training agütsütsü lir aser ibaji ajanga employment aser terenlok alitsü. Iba temelenshi asoshi Guwahati aser Dibrugarh nung aliba centres ya tongtired asütsü," ta Union Minister Sonowal-i ashi.

Ministry ajanga tesüiba küm ana tsüngta Northeast indang inland waterways sector nung sen 1,000 crore indang projects inyak tenzükogo aser sen crore

300 indang mapa renemogo aser sen crore 700 indang mapa 2025 tashinung renemtsü lir.

Tongtipangsa Pandu, Jogighopa, Dhubri, Bogibeel, Karimganj aser Badarpur nung teti asoshi cargo terminals yanglua lir aser Pandu Port nung küm tepiyong amshitetsüba fairway dredging, approach road tasen yanglua lir, Dibrugarh nung heritage restoration, sen crore 299 jenjang tourist jetties, Guwahati aser Dibrugarh nung skill development centres aser Bogibeel, Biswanath Ghat, Silghat aser Pandu nung lighthouse yanglutsü sentong lir, ta pai ashi.

State nung World Zoonoses Day mungogo

Dimapur, Chiteni/July 7 (TYO): Alima ajunga den külemi Directorate of Health & Family Welfare-i ayongzüka July 7 nü IDSP Hall, DHFW nung World Zoonoses Day mungogo.

Iba sentong ya Dr. Limasenla Lemtur (State Epidemiologist) lenisüba nung agi, aser lai ajak pelashishia agizükba den iba sentong yongzüka agiba nükjidongji zoonoses tashidak indang tangazükba agütsütsü aser iba anema raratsü aser longjemer asen health kümzüka ayutsü atema lir ta lepshia metetdaksü.

Sentong nung Dr. Nounengulie Kire (Consultant/ Public Health Specialist)-i Nagaland nung tang tashidak

jenjang indang PowerPoint presentation ka agüja liasü.

Kasa mapang nung Principal Director, H&FW Dr Mereninla Senlem-i o jembiba mapang One Health inyakyim ya koda tongtiban ibang indang lemsatep, koba ajanga meimchir, shiruru, süntonglitong aser ecosystem ajak kati ka dak metaloktepa aliba indang süoki ia agir. Laisa, tangazükba balala agütsütsü aser inyakyim takok atema tanga allied department tem den longjemer inyaksü nüngdakba lemsatepa liasü.

Sensaksem akaba mapang Jt. Director Animal Husbandry & Veterinary Department Dr. Amenla Walling-i, department koda tashidak nokdangtsü atema masü saka Clinical ken

o dak tali rangloker lir iba indang ashi. Laisa, mapang shitak nung anepalu mesüra aser menokdangra zoonoses tashidak ajanga koda mepetmesü adokdaksür iba indang lemsatepa liasü. Dr. Amenla-i azü agi angoba indang report dak sendakba nung data lemsateptsü atema Medical Department den longjemer inyaksü nüngdakba lemsatepa liasü.

Iba sentong nung Animal Husbandry & Veterinary Department nungi ketdangsürtem aser Directorate indang ketdangsür aser staff tem dena liasü. Sentong nungsa Dr. Nounengulie Kire-i (Consultant/ Public Health Specialist) tepela o jembi.

Capital College nung orientation sentong agi



Dimapur, Chiteni/July 7 (TYO): Capital College, Internal Quality Assurance Cell (IQAC)-i ayongzüka July 7 nü "Transformative Pedagogy for Empowering Students" omen nung ajemdaker tesayurtem orientation sentong ka ayongzüka agiogo.

Tesayurtem taruba academic session atema renemshidaktsütsü nükjidong nung iba orientation sentong ya ayongzüka agiogo.

Iba sentong ya Assistant Professor, Department of Tenyidie Theja Lohe lenisüba nung agi, shibai sentong nung shilem agirtem pelashishia agizük aser tanü kakat shisatsü bushiba nung kaketshirtem tenüngdakba peritsütsü atema temelenshi den sütepa inyakyim balala renloka aotsü koda tongtiban ibang indang lemsatepa liasü.

Mezüngbuba session ya "Changing Goals & Objectives of Education" onük nung ajemdaker agi aser shisalen sayurji Opangmenla Jamir, IQAC, Coordinator liasü.

Mezüngbuba session ya education sayuba aser angazükba inyakyim meleshia aoba dak rangloker agi. Laisa, education indang nüjdongji joko kakat nung keta aliba dak dang rangloker mali saka rasa bilemdangba, emotional intelligence, aser global citizenship ajungketsü atema rangloker inyaker, ta ashi. Iba session ajanga kaketshirtem lenla ajak nung terenlok atema tesayurtem parnok tesayuba nükjidong yanglushitsü ayongzüka liasü.

Tanabuba session ya Blended Pedagogy dak sendakba nung practical session ka liasü. Iba atema shisaslen

sayurji Dr. Rukulu Kezo, Assistant Professor, Department of English liasü.

Iba session nung tesayurtem dang Google Classroom, WhatsApp, aser Google Forms amala tongmelang digital hadir aser format tem, koba tesayuba mapang amshitetsü iba indang tangazükba agüja liasü.

Paisa, class ka mapang ya koda, sensaksemtsü, tebilemtsü bentetsü asoshi amshitetsü iba indang tasa balala agüja liasü.

Iba orientation sentong ya Q&A session ka agiba sülen shisalen sayur aser sentong nung shilem agirtem dang kanga pelaba lemsateper tembanga liasü.

IQAC-isa, tesayurtem dang orientation mapang angazükbatem parnok tesayuba nung inoka benshitsü aser maneni tasa tasentem bushiteta benoka aotsü ajungshia liasü.

Assam Rifles-i career fair ayongzüka agi

Dimapur, Chiteni/July 7 (TYO): Assam Rifles-i July 4 aser 5 nü Dan, Lungwa, Phek aser Dessoir nung career fair, Army mela aser lecture balala ayongzüka agiogo.

State nung lanurtem nem tangazükba balala agütsütsü atema outreach sentong balala ayongzüka agiba nung iba ya shilem ka liasü.

Iba sentong nung nisung 450 dak temai shilem agi, kong kaketshirtem aser lanurtem densema liasü, shirnok Armed Forces nung career tem atema

maongka alibatem angazüktsü tejangraba nung adenshia liasü.

Assam Rifles personnel temi recruitment inyakyim, eligibility criteria, training regimen aser libaliro balala aser Army nung career yangluba ajanga tajangzük angubatem indang metetdaksü.

Kasa mapang nung sentong agiba mapang shilem agirtem ajungshia sensaksem aka, prangbong hadir balala sayu aser tajungshiba video tem sayuba den lanurtem

ajungmsotsü aser shilem agidaksütsü atema tetoktepa balala ayongzüka agia liasü.

Iba inyakyim ajanga Nagaland nung civil-military na tesendaktep akangshitsü, lanurtem nem shilem agidaksütsü aser linük ka küma longjemtsütsü atema AR bendanga agütsür aliba tali tashi itshidaktsüogo. Local tem den tesendaktep tajungba küma yanglushiba den AR-i taruba putu nem tashi agütsütsü aser len sayutsü atema maneni tongtiban shilem agidar.

Angh aser MP (RS) nati Tuluni salem lemsatep **Dimapur, Chiteni/July 7 (TYO):** Nagaland Angh La Ganesan-i sangdong ka ajanga Sumi nunger aser Nagaland nung aliba nüburtem den Tuluni benjung salem lemsatepogo. Tuluni ya Sumi nunger asoshi benjung rongnungi tongtibangtiba lir, koba tenüsang agütsüba benjung ka aser iba mapang mapa meranga inyakba, telongjem aser yimji yimjung benjunger, ta ashi. Iba ya tesendaktep yanglushitsü aser yimjung atema nokdaksü mapang ka, ta Angh-i ashi. Iba benjung ajanga ajak nem tepela, tesunep aser tashi tasen agüjang, ta imlaja ataba Ganesan-isa lemsatepa liasü.

Kasa mapang nung Rajya Sabha Member of Parliament, Phangnon Konyak-ia Sumi nungertem den Tuluni benjung salem lemsatepogo. "Lai, Tuluni benjung ya pelatepa bejungtepba mongpu ka, koba ajanga lokti nung telongjem tatishitsü sayur, ta ashiba den Tsüngremi ajak teti molamushia mojang ta sarasademtsüba lemsatepa liasü.

EDTC-i kilentsü tebilemtsü lemsatep

Dimapur, Chiteni/July 7 (TYO): East Dimapur Town Council-i sangdong ka ajanga, sugar mill kilentsü atsünga aruba ajanga Airport temeket, Padumpukhuri, Purana Bazar B aser Purana Bazar dak kongshiba indang süoki ia bilemba lemsatepogo. Kilentsü asadanga maliba ajanga item tesemtem mapangshia tzü agi metsünger aser nüburtem meyrejang aika lendong bang nung toktsüba den kiojen raksatsür aser item tesem nung alirtem minpronger.

Purana Bazar B aser Purana Bazar na tsüngda sugar mill kilentsü atsünga aruba ajanga tzü sadema yima moteti nokdanga ayur aser iba yagi mapangshia lenmang, nisung aliba tesemtem aser alu metsünger. Iba ajanga nüburtem anogoshi inyakyim minprongba dang masü saka nüburtem health lendong nung toktsür aser kiojen aser osetsüt aika raksatsür. Anungji iba dak sendakba nung Council-i ken o dak sendaka aliba ketdangsürtem dang takaratiba nung item tesemtem semdanga kilentsü atsünger alibatem aginja tzü sadem sadema yimdaksütsü atema jenjang tapet agitsü mepeshia metetdaksüogo.

Chumou DPDB senden July 10 nü amentsü

Dimapur, Chiteni/July 7 (TYO): Chumoukedima Deputy Commissioner Polan John-i, July ita atema Chumoukedima DPDB senden July 10 (Brehostibar) nü 11 ako nungi tenzüka DC indang Conference Hall nung agitsü ta metetdaksüogo. Züngsem jak dang iba senden nung tanakok maludaksü arua shilem agitsü mepeshia metetdaksüogo.

Tsg DC-i senzusenpongtsü tetuyuba agütsü

Dimapur, Chiteni/July 7 (TYO): Tuensang Deputy Commissioner, Lithrongla Tongpi Rutsa-i sangdong ka ajanga, Chare jila aser temeket nung NH 202 nung tesem aika nung anentsüh aluba ajanga iba ya memerektet tashi gari tila aser tulu mesenzüi atatsü tetuyuba ka agütsüogo.

Kasa mapang nung district-i ailti tuguli ta asürtem dang teküboklen agüja aliba lenmangtem amshitsü metetdaksüogo. 1. Trongar- Alisopur- Longmisa- Mokochung. 2. Yangli- New Sangsangmong- Yehemi- Suruhoto. 3. Tuensang Village- Longleng- Changtongya.

DC Manpai Phom-i Yongam semdang

Dimapur, Chiteni/July 7 (TYO): Longleng Deputy Commissioner W. Manpai Phom-i, July 3 nü Yongam nung anentsüh alua aliba tesem semdanga tensa asadanga liasü. Tzünglu medangi aruba ajanga Yongam yimtsüng anasa July 2 nü anentsüh tulu ka alua Mon aser Longleng district na sendaktepba lenmang anenbanga liasü. Iba tesem semdangba mapang DC-i, lenmang koda raksa aji kanga junga asadang aser ketdangsürtem den lenmang lapoktsü atema sensaksema liasü. Iba lenmang ya takaratiba nung lapoktsü atema district administration-i jenjang agidar. DC-isa, osang tejangja ka magütsü tashi iba lenmang ya mamshitsü asoshi tetuyuba agüja liasü.

Longleng DPDB senden July 8 nü alitsü

Dimapur, Chiteni/July 6 (TYO): DPO aser DPDB Longleng member secretary-i sangdong ka ajanga July ita atema Longleng DPDB senden July 8 nü 12 ako nungi tenzüka DPDB Hall, Longleng nung amentsü ta metetdaksüogo. A. Pongshi Phom aser B. Bangtick Phom ta MLA anaprongla iba senden nung adentsü. Senden nung Department of Land Resources-i par department inyakyim indang PowerPoint presentation agütsütsü. Anungji züngsem ajak dang iba senden nung tamakok maludaksüi arua shilem agitsü member secretary-isa metetdaksüogo.

BRICS lenirtemi Pahalgam amakba aitsü



Rio de Janeiro, Brazil nung ayongzükba BRICS senden amendang tangokba noksa nung angur.

New Delhi, Chiteni/July 07 (Agencies): BRICS summit nung züngsem linüktemi tawa kiralongrartemi Jammu & Kashmir kübok Pahalgam amakba sashia aitsü aser kiralongra khenyongi magizüktettsü sangdongogo.

BRICS senden nung jembidang Ato kilonser Narendra Modi-i, Pahalgam amakba ya India tanela, maitsü aser akhümket anema inyakba liasü, ta ashi.

BRICS züngsem linüktem nungi tongti ketdangsertemi kiralongra anema raratsü, kiralongrartem arrtsü adena senzüba nokdangtsü aser senotsü agi kiralongra yariba anema inyaksü asoshi bangjemogo.

Brazil linük nung Rio de Janeiro yimti nung ayongzükba BRICS senden nung BRICS lenirtemi "Rio de Janeiro Declaration" sangdong. Iba sangdong nungji kiralongra, West Asia tensa, shishilembaba, saru aser UN Security Council nung temelenshi densema tongtimbang onük aika nung lenirtem tangatetba metetdakja lir.

BRICS lenirtemi, "April 22, 2025 anogo nung kiralongrartemi Jammu & Kashmir amakba tatalokba onoki sashia aitsür; iba mapang

nungji nisung 26 tepset aser aika yirua liasü. Onoki kiralongra tapu ajak anema raratsü, arrtsü adena kiralongrartem senzüba, senotsü agi kiralongra yariba aser kiralongrartem jenokdaksüba anema inyaksü," ta metetdaksü.

BRICS lenirtemisa, "Kiralongra khenyongi magizüktettsü atema onoki ajak ajungshir," ta metetdaksü.

BRICS lenirtemisa kiralongra anema raraba tsütsü taliba amalitepa inyaksü bangjemba den külemi UN-i sangdongba kiralongrartem/ kiralongrar teloktem anema inyaksü ayongzük.

BRICS senden nung Ato kilonser Modi-i BRICS züngsem linük ajak den longjemer inyaksü, ta metetdaksü.

Modi-i, "Kiralongra ya alima nung tebilemtsü onük tulutiba lir. April 22 nü amakba ya India anema inyakba dang masü saka meimchir ajak anema inyakba lir," ta ashi.

"Kiralongra aitsübaaji tensa mapang apir masütsüla. Kodang asenoki 'koba linük amak, shirnoki amak aser shirnok anema amak' ta tama asadangdir, ibajibo meimchir ashioktsüba asütsü. Kiralongrartem nem temerenshi agütsütsü atema kecha marendaksüla," ta ashi.

"Pei nija tajangzük mesüra yimtenren tsütsü tajangzük angutsü atema ola madoki kiralongra pusemba aser kiralongrartem pusembaji khenyongi magizüktettsüla," ta paisa shisem.

BRICS lenirtemisa tang alima tesem balala nung raraba tensa atema tebilemtsü akaba lemsatepba den külemi Israel-i Iran amakba aitsü.

"June 13 anogo nungi tenzüka sepaitemi Islamic Republic of Iran amakbaji onoki aitsür. Iba ya International ozüng aser UN Charter anema lir," ta BRICS lenirtemi metetdaksü.

"Metetsümonga civilian kiojen amakba aser International Atomic Energy Agency (IAEA) kübok aliba nuclear facilities amakbaji onoki aitsür," ta kasa sangdong nung shia lir.

BRICS senden nungji China Tir Xi Jinping, Russia Tir Vladimir Putin, Iran Tir Masoud Pezeshkian aser Egypt Tir, Abdel-Fattah el-Sissi nungerbo maden.

BRICS bloc nung mezümpur züngsem linüktemji Brazil, Russia, India, China aser South Africa linüktem lir. 2024 küm iba telok nung Egypt, Ethiopia, Iran aser United Arab Emirates züngoka liasü aser 2025 küm Indonesia-a züngokogo.

Bihar nung SIR anema benokba ken otem SC-i angadangtsü

New Delhi, July 07 (Agencies): Bihar nung assembly election agitsü ita ishika dang lia June 24, 2025 nü Election Commission of India (ECI)-i Bihar nung Special Intensive Revision (SIR) sangdongba anema ken o aika benoka lir, ajioda Hombarnü Supreme Court-i item ken o pongu angadangtsü melungogo.

SIR anema Supreme Court nung ken o benokertemji TMC MP Mahua Moitra, taoba mapang AAP yaritepa tentetsang Yogendra Yadav aser RJD MP Manoj Jha nunger den Association for Democratic Reforms (ADR) lir. Item temepishiba ken otemji Bench of Justices Sudhanshu Dhulia aser Joymalya Bagchi nati angadangtsü.

Temepishiba ken o benokertem tenüng nung Senior Advocates- AM Singhvi, Kapil Sibal aser Gopal Sankaranarayanan nungeri SC dang item ken oji angadangtsü takhangba agüja liasü.

Taküm November ita nung Bihar nung assembly election

agitsü lia June 24 nü Election Commission-i iba election atema Special Intensive Revision (SIR) sangdonga liasü. Amongnü Yadav aser Moitra nati Supreme Court nung ken o balala benoka liasü. Parnoki Supreme Court dang Election Commission-i sangdongba SIR ji agientsü mepishiogo.

July 5 nü Prashant Bhushan-i aniba melungtet telok Association for Democratic Reforms (ADR)-ia Supreme Court dang, SIR tetuyuba ajanga Bihar election nung voters lakh aikati vote magütsütettsü, ta metetdaksü.

Singhvi-i SC bench dang, SIR ya junga mebenoktettsü aser mapang tatsüka tsüngda ajungbena iba tetuyuba agütsüba ajanga Bihar nung sensakertem aser tekübok jenjang nung alir voters aikati senso kulikaket magütsütettsü, ta metetdakja liasü. Tamalen Election Commission-i, SIR benokba mezüngbuba state ji Bihar lir, ajisüaka SIR mapatong ya linük tesem ajaklen benoktsü, ta metetdakja liasü.



July 07, 2025 nü Mumbai nung Maharashta state assembly senden tagidak mapang nung Opposition MLA temi assembly kima longkak aitba noksa nung angur.

July 9 nü Central Trade Union-i linük tesem ajaklen longkak aittsü

Kolkata, July 07 (Agencies): July 9 nü linük tesem ajaklen longkak aittsü atema Central Trades union-i ayongzükba sentong nung bank nung inyakerem association katia shilem agitsü, ta sangdongogo.

Centre sorkari benokba rongsenkettsüng mapatong balala anema central trade unions-i longkak aittsü ayongzük.

All India Bank Employees Association (AIBEA) den affiliate süa aliba Bengal Provincial Bank Employees

Association-ia longkak aitba nungji shilem agitsü, ta metetdaksü.

AIBEA, AIBOA aser BEFI densema banking sector trade unions aikati shilem agitsü.

Insurance sector-ia longkak aitba sentong nungji shilem agitsü.

Industry nung inyaker crore 15 dak temai Central sorkari corporates pusema benokba mapatongtem aser labour anema benokba mapatongtem anema longkak aittsü, ta bank employees' union-i metetdaksü.

MP tem telok kati Dalai nem Bharat Ratna agütsütsü mepishir

New Delhi, July 07 (Agencies): Tibet nunger pusema party balala nungi MP temi longjemer Centre sorkar dang Tibet nunger lenir, Dalai Lama nem Bharat Ratna agüjang aser Parliament nung onük jembitsü atema Dalai Lama nem temelaba agüjang, ta takhangba agüja bangzüng ka renemogo.

Iba takhangba agütsüba ajanga China ano taliba jashidaksütsüa akok.

'All-party Indian Parliamentary Forum for Tibet' telok nungji Bharatiya Janata Party (BJP), Biju Janata Dal (BJD) aser Janata Dal (United) nungi MP tem densema lir. Tan ita kija nung parnoki tang agi tanabenbuba senden amenba mapang nung iba bangzüngji

renema liasü.

Yaküm December ita nung mezüng iba telok senden amenba sülen China-i ibaji kanga ashishia liasü.

BJD Rajya Sabha MP, Sujeeth Kumar-i aniba committee nungji züngsem ter lir. Parnokisa Dalai Lama nem Bharat Ratna agütsütsü atema nüburttem nem-a pusemdaksütsü asoshi signature campaign ka tenzükogo.

"Dalai Lama nem Bharat Ratna agütsütsü atema onoki signature campaign ka tenzükogo. MP tem aikati ibaji pusemer aser MP kariibo iba campaign pusema video ajanga osang balala lemsatepogo. Onoki shidi ajanga Lok Sabha aser Rajya Sabha naprongla

nung Speaker dang külem Parliament senden ka ayongzüka Dalai Lama nem onük jembidaksütsü atema jaokang ta mepishitsü," ta iba forum nung convenor Sujeet Kumar-i metetdaksü.

Iba Forum nung züngsemtem rongnung Ashok Bajpai, Lahar Singh Siroya, Vinay Dinu Tendulkar, Tapir Gao aser Rajendra Agrawal nungera densema lir.

Parnoki ayongzükba campaign ji pusema Arunachal Pradesh MP, Tapir Gao-ibo Tibet nunger pusema rally ka ayongzüka akatsü benokogo.

"Parliament Central Hall nung Dalai Lama nem yimjung aser temeim ama onüktem nung onük jembidaksütsüla," ta bangzüng nungji shia lir.



TIR YIMYIM YIMOBILEM (EDITORIAL)

DIMAPUR

SANGTENNÜ

CHITENI 08, 2025

Arogo aser Govt na kong lir ?

Dimapur nung tesem aika tzü agi atsümbanger nisungtem talidak maka timtemdagi aser ki aitsür mouaka ano kibong aika ki tom ka tashi atsümbangba agi ki yipten süoshi ajak metener aser kioseta aika raksar temulung shirangba mapang lir. Atangji, item timtem ajururtemji Naga nungertem dang masü saka tsümartema aika lir, anungji timtem takoksa ajururtemji arogo nungertem dang masü saka limapurtema aika dena lir. Ajisüaka, item ajakji kasa alima meimchirtem aser yimti ka nung külemi alir asen kiyongertem lir. Iba ama külem lisemer asen kiyonger, asen sensosangertem aser asen arogo nungertem ajungben timtem takoksa agi tonger shisabolua alidang government nungi yimsüsür aser ketdangser kata süiba mangur aser Naga arogotem rongnung arogo katia temeim teka songtoka yariba osang mangashir. Ibajiang tzümitsüng aruba dang nungi shisatebuluba kümogo. Atangji, tera menur süaka Dimapur nung government ketdangsertemi District Disaster Management purtem yoka relief camp karbo mesemteter talidak makatsüsa timtem ajururtem yariba angur. Aji agi temulung terabo anisüngzüker. Kasa mapang nung asen lima nung dang masü saka tanga state nunga tzümitsüng aser anentsü agi nisungtem timtem takoksa ajuruba angashir. Aji oda, Meghalaya nungbo Chief minister dena longpant nepketer tzümitsüng nung temekok tashi angüma ir timtem takoksa ajururtem ajurua senzüba angudang, Nagaland nunga chief ministeri anir MLA kati danga yamaji tzümitsüng aser alima lendong ajuruba mapang tzümitsüng ajangdanga oa timtemertem ajurua senzütetlasang nübortem mulung koda anisüngzükla ta bilemer. Ibaji dang masü saka anogo shia temeim indang jembiba arogotem ajak to tzümitsüng nung sama asü ta bilemtsüsa, arogo katia tzümitsüng nung timtem takoksa ajururtem asoshi aria bilema temeim aser teyari teka agi atongba mangur aser mangashir. Ashiko, asenoki temeim ya benjongbentsü nung amshiba aser sayuba mapa ka amai bilema alitsüa akok, ajisüaka taoba sentep nung asenoki temeim indang jembiba to mapa agi sayutsü atema tang tzümitsüng nung nübortem timtem takoksa ajurur amai asenoki angatetla sang, arogo asoshi tzümitsüng nung nisungtem timtemba mapang ya Tsüngrem temeim mapa agi sayutsü mapang tajungtiba süla. Iba ama temeim aser teyari teka nüngdakba mapang asenok Naga arogotem küm piyong inyaka aotsü senotsü sentong yanglu dang, arogo budget nung tangar nüngdakba purtem asoshi temeim mapa inyaksü atema bilema sen tera kabo lezmüksür asü melezmüksür ta bilemer. Ashiko, tang ama alima lendong timtem ajurudang temeim mapa inyaksü asoshibo asenok arogo nungertemibo tebilema mebilemi alitsü südi. Aji oda, asenoki temeim mapa inyakbaji arogo nung tenzükertem mesüra arogo nung züngsem kibongtem timtem ajurudang envelope ka nung sen tera sepa bener sarasademtsüi aobajia ta bilema alitsüa akok, ajisüaka ajibo temeim mapa masü, aji sobaliba. Iba jagi asenoki temeim mapa inyaker ta meblemstsüla. Temeim mapajibo aseni yaritsüsa kecha sentsü tsüa mali ser nung meyipa angutsü kecha meimlai angati yaribaji dang shitakba temeim mapa asütsü. Tsüngremia asenok arogo nunger dang yamaji meim aser yamaji meimer, anungji asenokia kasa temeimji tangar dang sayudaktsüner. Iba amaji ka asenoki meinyaktetra, asenok tenla ki topur junga yangluba, staff quarter tajung asüba, ki bara asüba aser küm nung 20 % Mission mapa nung endoker tanüngba 80 % bo ita sen, kisüjensü aser chia ajemba nung dang endokbaji Tsüngrem temeim mapa inyaker masü saka Tsüngrem tenüng amshia ayangertem dang asütsü. Atangjila nung asenoki temeim aser ochi indang jembiba ya 'sermon' aser 'puplic speech' ka dangbo masütsüla, itemji tang ama temeim nüngdakba mapang mapa kuma inyaksüla.

OLEMSABANG

Aor Tar Yimsüyimbong

Wt. Repabenla, Asst. Professor, FAC

(Maneni yashi adok nungi...)

Metsü Walok mung amungtsü atema yimsüsüri yimdak ayimoktsür aser putiri takar kidang nungi tsük metsü tabensa bendener oa waloker / külemer. Parnoki iba tekülem nung alu modong tajung meyitsü, tsük molulisem ama arotsü aser tsünüsembongtsü jungdakjang ta amunger. Tenden munga parnoki parnok aluyimer asoshi tsüngküm mongpu tajung atema mepishia ano tsük nungi tenzüker metsü yokba ajak junga meyitsü ano shiruru kechaia alu meraksatsütsü atema külema amunger. Aor rongnung tongtibang amung kaji Chitenmung ya lir. Iba anogo nung nokor dak alaka putu yimsüsüri anir süngpu zünga tashi yimer arem yata lenmang apitsü aser shiba kuli tajung makai mapai muolir takhang sa agia liasü. Chitenmung ya alu nung tsük tasen rozüka putiri tama tsüngrem dang temoatsü meshiba mung (Pre-harvest ritual).



Item amung den ano aluyimertemi mongpu melentepba aodang küm kar nungbo mongpu majung denjidang alu nung longpen mesen pokteter, khen khenbo tzünglu junga marui anü tatsük agi mo asür, ano küm ka kabo koya tali pokteta modong chimatsür. Item ama tensa denjidang Mosü mong, tsüngküm mongpu majung sobatiaba dang tzünglu yokang ta mepishia külemba mung. Mesenchem mung / longpensem mung nung alu nung longpen mesüra mesensangnu agi alu nung modong kanga raksatsüba ajanga item teraksaba nungi jenbua alitsü yimkong longpensümung sa amung. Koyabang Alang mung ya koya jenti pokteta alu modong kanga mejungi raksaja achiba ajanga item nungi kümzüksü asoshi yimkong kenüsa külema amung.

Alu dak sentakba amung amaji tar nisüngtemi amungtsümungji kanga dang metsünga reta munga aru. Yamaji yim dak sentaklokba nunga Yim Külem mung nungi tenzüka amung aika liasü. Yimdaka ajungben ajuruba tensa tatishitsü agi; yimti nung wara arudang Waralepdang mung, ki arungdang Kirung mung, tzünglu marura tzünglu jazük mung munga aru. Kodangsa parnoki item amung tensa den apet ken yamaisa aten,

Alimako alirr,
O Kotaktsüngba Anüngtsüngba,
Ali yangerba tzü ashir.
O Tzülapangba, Papubangba,
Nena yushi ajemale,
Alimako alir bilemangma no,
Oh, küyim sanger dangji chilushia
Tenale, Tsükmetsü shilangjangma.

Tetezü: Alima nung aliri Anüng tsüngrem,
Ali yanglusang tsüngrem dang mepishira,
Tzüla ayong O papu ayong nena lungjemer,
Alima nung alir meimchir bilemangma
Tangar dang tsükmenatsü apua alu nung
Atenba meyipa agütsütettsüsa,
Tzünglu yoka alu nung mo junga shilangdakjangma.

2. Sobusolemtsü

Alima nung kechi yimsü südir taküm libaliru aser sobosulemtsü ana ya ajak nung metaloktepa alir. Yamaji asen Aor-a teburtemi abenba tsüngkoteptsü / sübangsü, temko, ozümi, shipu, lakep molong, kümbang, süjak etc. aser tetsüria etsüng sü, yongmen, kupok, kara kümbang, berem zük, chuba kap etc. Item ajak dak ya asen Aor koma aser koda liyonga aru ibala otsü keta lir. kodangsa konang nüngsang manung washitepa yar tsüngsangdir item sobutsü agir arua lokti jakdang ayak sayua tsüngsangtepa aru. Saka Tar yimsü nung kodang tsüngrem külemi odir kanga ajemalua tsüba külem. Tongtibangsa shiba ambong südir pabo süoshiji kanga junga jep jepa sobotsüla, kechaser tekülemba mapangji sü tashi mabenshitsüla ta metsünga reta amanga aru. Tanü asen putu nungbo takar sensaker kecha tependang mekai süoshi agiteper, saka otsüla oboula nungertembo takar sü achirtem aser parnok chirnur tashi takar süoshi balakasa sobua aru. Nisüng kari pa/la takar ta rasa-a meshiaka parnok süoshi agiba jagi item ya takar ta shisangshisanga ajitet. Yamajisa nokinketer talep tatsüngertema parnoki mangko bener aruba konang ayakji par sobutsü nung reprangteta lia aru. ano külen tetsürtem parnok kin sü agiba jagi lar kinji jangjajangja metetdaksü, iba jagi kibalenbu tsütsülena kecha aibelen mesüi teburtemi kin kidong meteta asüngdangasa aru.

(Maneni asüng adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Texas Christian summer camp nung adener tetsür 10 tang tashi mangur



Texas kübok Hunt nung Khristan summer camp 'Camp Mystic' sentong agiba tesem anasa ketdangsertemi samaba nisungtem bushidang tangokba noksa nung angur.

July 07, 2025: Taoba Hokolbarnep nungi tenzüka tzünglu maneni aruba ajanga tzümtsüng lendong tulu ajurua Texas kübok county trok nung nisung 81 asüba jangjaogo.

Iba lendong nung Khristan summer camp nung ka nung adener tetsür 10 den counselor ka tang tashi mangur, ta ketdangsertemi metetdaksü.

Kerrville aser temeket nung aliba tesemtem nung Department of Public Safety nungi nsiung 230 den National Guard aser tanga agency balala nungi züngsemtemi samaba nisungtem bushidar.

Amongnü osangbenertem senden ka nung jembidang Kerr County Sheriff, Larry Leitha-i, tang tashi nung nisung 41 samaba jangjaogo aser iba nungjagi Camp Mystic camp nung adener tetsür 10 den counselor ka densema lir, ta metetdaksü.

Khristan summer camp nungji tetsür 750 shi dena liasü.

Hokolbarnep Kerr County nung Camp Mystic tagidak mapang nung tzümtsüng tulu

alua liasü. Guadalupe ayong nung tzüji süklep 25 dak tali metsünga liasü.

Amongnü Texas tesem balala nung pastor temi takoksa angurtem aser samaba nisungtem atema sarasademjang, ta mepishia metetdaksü.

Camp Mystic ya küm 100 tejaklen University of Texas nung football coach kati Guadalupe ayongkümlen tenzüka liasü. Iba camp ya tetsürtem tanela asentenshi sentong ka lir.

Hokolbarnü tzümtsüng lendong nung asürtem rongnung Camp Mystic director, Dick Eastland aser Heart O' the Hills Camp for Girls nung mapang talangka director inyakla, Jane Ragsdale nata densema lir.

Amongnü Dallas nung aliba Park City Baptist Church-i social media ajanga, par Arogo aser anasa aliba school tem nung azüngertemi Camp Mystic nung adenertem atema sarasademtsüogo, ta metetdaksü.

Arogoi kasa sangdong

ajanga, "Timtem ajangshirtem aser iba lendong agi kongshiba kibongtem atema onoki maneni sarasademtsür. Maneni sarasademang aser Kibuba dak imlaang," ta metetdaksü.

Texas Governor, Greg Abbott-ia July 6 (Amongnü) ya Texas nung sarasademba anogo ka asütsü, ta sangdonga liasü.

Honibarnü osangbenertem senden ka nung jembidang Abbott-i, "Sarasadem ajanga mapa inyaker, ta asenok ajaki meteta lir. Iba lendong nung samaba nisungtem ajak ngutettsü atema onoki maneni bushiba mapang nung maneni sarasademjang ta onoki mepishir," ta metetdaksü.

Iba lendong atalokba sülen Khristan melungtet telok, Samaritan's Purse-ia iba tesem jagi Disaster Relief Units aika yokogo.

Samaritan's Purse-i Facebook ajanga, "Takoksa angurtem tajungtiba nung anepalutsü atema onoki emergency officials aser Arogo partners den külemi inyakdar," ta metetdaksü.

China nung Communist ketdangsertemi Arogo aika mita aoer

July 07, 2025: China nung Communist sorkari Arogo aika mita aoer, talisa linük tesem balala nung Zion Arogotem mita aoer, ta International Christian Concern (ICC)-i metetdaksü.

Taküm May ita tatembanglen nungi tenzüka Chinese Communist Party (CCP) ketdangsertemi Arogo aika mita oa lenirtem amokmeren aser Arogo nung züngsemtem dang asüngdangya.

Beijing Zion Church ya mapang ka nungbo Beijing nung house church tulutiba liasü (züngsem 1500 dak tali liasü) ajisüaka 2018 küm ketdangsertemi iba Arogo nokdangogo.

Iba sülen Zion Arogoi linük

tesem balala nung Arogo tila aika tenteta liasü, ajisüaka ketdangsertemi item Arogotema mita aoer.

Sorkari iba Arogo samatsütsü meranger, ajisüaka Arogo züngsemtem tamang jenjang manokshii tesem dang melenshia tekülem sentong agia arudar.

May 30 nü ketdangsertemi Hefei, Anhui Province nung Zion Arogo mita aoba den külemi Arogo nung züngsemtem ki aika mita ao. Iba mapang nungji Pastor Gao Le bo tangalen liasü, ajisüaka Arogo nung züngsemtem anema inyakba osang angashiba sülen pa meyipa arudang ketdangsertemi pa anogo pongunü tashi pua ayu.

June 1 nü Guiyang Arogo

nung tekülem sentong tagidak mapang nung police arua iba tesemji longbangba sülen Arogo nung lenir Yao Yong aser Mao Yue na pua liasü aser anogo 15 sülen ang chio.

Ketdangsertemi Chongqing nunga Zion Arogo asem shibangtsüogo. Hangzhou, Ningbo aser Guiyang nunga police-i Zion Arogo nung züngsemtem dang asüngdangya aser Jiaxing, Zhejiang Province nung Arogo züngsemtem dang IDs asüngdanga liasü.

Pastor kati, "Tang tatalokbatem ya sorkari Zion Church anema ken o kar aliba agi inyakba masü saka sorkari linük nung Khristan Arogo ajak anemba agi lir," ta metetdaksü.

ANOGO ABEN TSÜNGREM DEN

Nuso Ashiba

Saka item ajak tekangshitsü tetenzüker
Mathi 24:8

Khrista kadang meyiba arutsü? Putu ajak nung iba tasüngdangba kanga shisadanger. Khrista tangsa arutsü ta bilemba agi Khristani inyakba ajak tesülen atsüngzüksür. Khristai Pa kadang arutsü mapang shidakji mashi saka saksalema alitsü taitsütembo pai ashi. Mapangji mejangja saka Pa arutsüji tejanga.

Tatalokba kar ajanga Pa arutsü mapang anasa lir ta sayutsü ta Yisui ashi. Idakji raraba aser raraba osang alitsü; ayawara aser menoknok alitsü; Khrista asoshi Khristantem rishikangshitsü; tiyazü ainkar arutsü aser tiyazü sayutsü, aika mashileni anitsü; ozüng raksar jenti adoktsü, nisungtemi pei nükdang kechi tajung aji inyaktsü, yimsüba menden nung alirtemi ozüng raksartem azüoktsü makoktsü, temeim mokonga akümtsü (Matt. 24:6:-12).

Tatem mapangji nüsotsü tekangshi ama alitsü ta Yisui ashi. Tanur asoshi tashitsü atuba tali tali akümer, aser ibai maremtetti atur. Rara mesüra ayawara mesüra tiyazü tesayur adokba tetezü Pa aruba asenok den lir ta Yisui mashi. Itemji tetenzüker dang lir ta Pai ashi. Khrista maru tashi rara, menoknok aser ozüng raksartem tali tali adoktsü ta Pai ashi. Tatem nung Khrista arudang item ajakji tatem akümtsü. Rarartem, ayawara aser meimchir mepetmesü ajak tatembang kati arutsü.

Yisui jembiba ajak asenok mapang nung ngua arur. Yisu arutsü asoshi khristantem saksalema atatsü mapang ka süra ibaji tanü lir.

SBC-i ayongzükbba MFuge summer camp nung kaketshir 12,000 adener

July 07, 2025: Southern Baptist Convention (SBC)-i America tesem balala nung ayongzükbba MFuge summer camps nung nisung 12,000 dak tali dendar.

FUGE Camps kübok camp asem- Mission Fuge (MFuge) camps, Centrifuge Camps aser CentriKid Camps lir.

SBC indang Lifeway Christian Resources nung otongdari, tang meiwa mongpu nung tesem 25 nung ayongzükbba MFuge camps nung tanur-tain 12000 adentsü ta metetdakja liasü.

Summer camps nungji Bible study den külemi tekülem sentongtem agitsü, tanurtem den külemi mapa inyaktsü, food bank ka nung tenzükbba mapa inyaktsü aser mapa balala nung shilem agitsü.

FUGE Camps manager, Joe Hicks-i, "Tsüngremi FUGE Camps dang kanga jungogo. Asenok taküm aliba ya Pa ajanga lir. Kaketshirtem Tsüngrem anasa taliba odaktsütsü tejangraba nung onoki inyaker," ta metetdaksü. Paise, "Tanurtemi MFuge nung tenzükbba mapa balala

inyakba ajanga mission indang taliba metettsü aser pei nüburtem rongnung tenzüksü atema maangka angutsü. Anogo shia tangar tenzüksü aser Khrista osangtajung lemsateptsü atema parnoki angazüksü," ta metetdaksü. Alabama nung aliba University of Mobile nunga MFuge camp ka ayongzüka agitsü, aser iba sentong nung kaketshir 2,400 adentsü imlar. Yaküm iba University nung ayongzükbba MFuge camp nung nisung 90-i Khrista nem taküm bendang agüja liasü.

Tan hopta Alabama nung aliba First Baptist Church of Centre-ia kaketshir 60 Lebanon, Tennessee nung aliba Cumberland University-i yoka MFuge camp nung dendaktsütsü.

Arogoi kaketshir shia nem MFuge camp nung teindokba sen shilem 50 agütsütsü. FBC Centre nung kaketshirtem atema pastor, Tucker Bryson-i, kaketshirtemi MFuge camp nung adenba ajanga Yisu Khrista temeim taliba jangjatsü imlar, ta ashi.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Teptok

- (v) oset ka amshia langka endokba (thrown away with shovel type tools)
* Onoki ozü kima lishi belja amshia teptok.

Teptsü

- (n) temang nung noksa teplokba (tattoo)
* Akhi tsüraburtemi pei tejak nung teptsü atep.

OLONG PAITEP # 7202

	1	2							3	
4										
5								6		
7								8		
9	10				11			12		13
14				15						
	16									

TIPIEN

1. Ajem-ajemer - 9
5. Kanga tapet - 7
6. Ozü ka tenüng - 3
7. Tzünglu nungi kümzüker - 6
8. Anüng nungi tsüker - 3
9. Anüng shiruru - 3
11. Lenmang ajurutepdak - 6
14. Anüngdang tesangwa - 3
15. Tekong merang - 7
16. Teyazü jembia tangar
ashioktsür - 9

LANGTSÜNGLEN

2. An-i akor - 5
3. Tashi aketba chiyungtsü - 5
4. Kecha menungnangi - 4
10. Küm asem tarensen - 5
12. Nisung yimyatsüya - 5
13. Mali / mait - 4

OLONG PAITEP # 7201 TELANGZÜBA

TIPIEN :

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon, 4. Aso,
6. Nile, 9. Alizüng, 10. Omen,
11. Lemta, 13. Ola, 14. Kin.

NAI-A YA METETTER MA



Nepali nunger tenemi atur Kami Rita Sherpa-i pai yanglur aliba otsü tasen ajateta taoba ita Everest-i (tebur) timtiba atuba nisung kümogo. Pai alima nung tenem talangtiba yagi 31benbuba tur aluogo. Pa mezüng 1994 küm May 13 nü arishi küm 24 asüba mapang iba tenem yagi tua liasü aser iba sülen kümshia tua arudar. Arishi küm 55 tain sherpa dang ya "Everest Man" ta ajar.



Office of the MERANGKONGTSÜR TELONGJEM

H.Q. Merangkong, Dist. Mokokchung, Nagaland

TENUNGSANG AGÜTSÜR

Merangkongtsür Telongjem Mungdangti ajanga,
Dr. Mereninla Senlem, asür Dr. T Senlem aser asür Punala Senlem-er jala, Principal Director, Health and Family Welfare Department, Government of Nagaland, menden tashi tongtetba asoshi tenüngsang aser tetushi tulu agütsür. Tsüngrem-i maneni nü mapa ajak nung takok aser temoatsü nung len aniang da sarasademtsür.

Sd/-

TSUKNUNGPENLA

President

Merangkongtsür Telongjem

Sd/-

LEPZUNGSANGLA

General Secretary

Merangkongtsür Telongjem



Myanmar nunger 3,000 dak tema Mizoram-i jena aru

Aizawl, Chiteni/July 7

(Agencies): Taoba hopta Brhostibarnü nungi Chin nunger telungpur telok ana khatepba sülen Mynmar kübok Chin state nungi nisung 3000 dak tema Mizoram nung Champhai district kübok Zokhawthar yimtsüng nung jenoka lir ta ketdangsürtemi metetdaksü.

Ketdangsürtemi ashiba agi, Myanmar nungertem ya arrtsü nung aliba Khawmawi, Rihkhawdar, aser Lianhna yimtsüng nungi lir. Chin National Defence Force (CNDF) aser Chinland Defence Force (CDF) na tsüngda kanga sashia khatepba ajanga parnok ya jena aotsüsa aküm.

Item nisungtem ya marudang yongi Mizoram nung Myanmar nunger refugee 32,000 dak tema jenoka liasü.

"Honibarnü telungpur tenok ana tsüngda kanga sashia khatepba sülen refugee tem ya

Brehostibar nü nungi Mizoram-i ait tenzük. International arrtsü nung tensa tajungba kümogo, kechiyong khatepba yashi nikongtsütsü anenogo," ta ketdangsür yagisa metetdaksü. Paiza, Deobarnü ano refugee 300 Zokhawthar-i aitogo, ta ashi.

Tiau ayong koba Indo-Myanmar arrtsü nung ayimer iba ayong yagi Zokhawthar aser Myanmar nung Khawmawi na bendangtsür.

Ketdangsüri ashiba agi, Assam Rifles shirnoki international arrtsü anüker parnoki lendong kecha matalokdaksütsü atema Indo-Myanmar arrtsü shibangtsüogo.

Ajisüaka security forces temi kidanger linük nungi refugee tem arutsü meladar, shirnok Mizoram nung jenoktsü asoshi aitsü meranger, ta pai ashi.

Local lenir kati ashib agi, CNDF aser CDF naprongla ya

Zo nunger teloktem lir aser iba telok ana ya Khawmawi tesem azioktsü merangteper, koba Chin state nung shishilembadak teyongtsü ka aser India aser Myanmar na tsüngda tongtibang transit point ka lir.

CDF-Hualngoram ya Chinland Council (CC) kübok inyaksangshir aser CNDF aser parnok indang political wing, Chin National Organisation (CNO) na ya Chin Brotherhood (CB) alliance nung densema lir aser parnok ya Interim Chin National Consultative Council (ICNCC)-i yimden yimsüsüba tsütsü len sayur.

Local lenir yagi ashiba agi, CNDF züngsemtemi parnok züngsem ka tasümayang Honibarnü Aizawl nung par kinunger ka kidangi bener aru.

Paiza, telok ana khatepba sülen telungpur pezü tashi yiruogo, shirnok temang anepalutsü atema Mizoram-i bener oa liasü.

Manipur nung osangbenertemi longkak ait

Imphal, Chiteni/July 7

(Agencies): All Manipur Working Journalists' Union (AMWJU) aser Editors' Guild Manipur (EGM) tawabangba kübok osangbenertemi

Hombarnü Imphal nung mener longkak aitba sentong ka ayongzüka agia liasü. Gwalabi nung tatalokba dak sendakba nung state sorkari ola madokba atema parnoki iba jenjang agia liasü.

Taküm May 20 nü osangbener telok ka Shirui Lily Festival lapokba sentong indang osang agitsü atema Ukhrul district headquarters-i oya aliba

mapang security personnel temi parnok ya Litan Police Station kübok Gwalabi tesem nung sota liasü.

Media organisation tem yagi ashiba agi, iba tenokdangba agütsüba ya media organisations nüjiso aser osangtsüasang agitsü atema nüburtem temeden aliba anema lir.

Longkak aitba amapang o s a n g b e n e r t e m i "Osangbenertem atema Gwalabi lapokjang," "Media azioktsü merangba ya tsübuba temaitsü lir," aser "Osangbener amakbaji democracy amakba lir" ta placard tem nung zülua

bener liasü.

Manipur Angh-i, iba tatalokba bushisüngdangtsü atema nisung ana agi kümteba Inquiry Committee ka tentettsüogo. Ajisüaka committee-i ngutetbatem tang tashi nüburtem nem metetdakja mali.

AMWJU-i sangdong ka ajanga ashiba agi, parnoki aiben mepeshiaka state sorkari repringtetsüsa jenjang agia mali mesüra ken o mejangjashitsü. Union-i ashiba agi, ketdangsürtem-i kecha jenjang magiba ya Manipur nung press nüjiso atema kanga süok ia agitsüba ken o ka ama züngshir.

Assam nung tetsür chanu ka soseta asü

Doodooma, Chiteni/July 7

(Agencies): Tinsukia district nung class teku nung azünger arishi küm 14 tain tetsür chanu ka dak tashiyim amshiba sülen la Deobarnü soseta süogo.

Osang ajang ashiba agi, Hatighuli High School nung tesayur kati la sexually harass asüba sülen la ya soseta asü.

Iba tatalokba ya lar kidang atalok. Lai lasasa aletseta asü. Aiür chanula ya temang kanga mejungi mozükidangi aritepa anir ao saka süatok.

La dak tashiyim benshiba atema tesayur ka tenüng agi Bhriku Chetry aitsür lir.

Osang balala ajanga ashiba agi, tesayursang yagi la nem sleeping pills agütsü aser mebenshitsü yimya benshia liasü.

Tanutsüla ya June 3 nü mezüngbuba soseta asütsü merangba sülen iba ken o ya temai adoka liasü. Iba anogo la doctor temi kümzüka liasü.

La yaritsü kanga merangdangogo, saka lai lasasa la taküm agiogo aser iba ajanga lar kinungertem aser lokti aoksadaksüba tem mangyim tia nung toktsüogo.

Aija aliba tesayur ya ta June 11 nü apu aser judicial custody

nung yua lir.

Ken o dak sendakba nung Bengali Youth Student Federation-i takaratiba nung obendang agütsütsü aser aija alisang ya fast-track court ka nung obendangtsü takhangba agütsüogo.

Iba tatalokba ajanga Dhola aser Tinsukia ajunga nung nüburtem kanga mepelateper, aser kaketshirtem kümzüka toktsütsü atema jenjang tapet agitsü nüngdakba ola adokba den iba amala mesükba ken o tem ya takaratiba nung bentettsü takhangba tali kümogo.

GOVERNMENT OF NAGALAND

DIRECTORATE OF TECHNICAL EDUCATION

NAGALAND: KOHIMA

Dt. Kohima, the th July, '2025

NOTIFICATION

NO.DTE/ESTT-2/NEET/01/2024-25/ This is to inform all the NEET-(UG) candidates who have submitted forms for undergoing MBBS/BDS & Allied courses for the current academic session 2025, that the NEET Merit list for the State of Nagaland is uploaded in the Department website: www.dte.nagaland.gov.in and also in the Notice Board of the Directorate of Technical Education, Nagaland, Kohima.

The candidates are informed to thoroughly cross-check the details furnished in the merit list such as; Name of the candidate, Father's Name, NEET score & ST rank.

In case of any discrepancies, the candidates are informed to provide correct details to the office of the undersigned on or before 10th July, 2025 during office hours.No correction or changes in any manner shall be entertained thereafter.

Selection and nomination for filling up the State reserved seats will be notified in due course of time.

(ER. VIPULHOU LHOUGU)
Director

SÜNGRATSÜ OZÜKUM KIDONGI
TENÜNGSANG AGÜTSÜR

Wb. Yangermongba Ozükum aser Wt. Moasangla (Akhoya) na jaboso Sp Rongsensowa Ozükümi LDA Cum Computer Assistant, NPWD 2024 NSSP/ CASE tatidang nung takok anguba tenüngsang agütsür. Tsüngremeri taküm arishi tajung moaja-a mapa tajungtiba inyaktetsü sarasademtsür.

Sd/-
I. Mangyang Ozüküm
Tatar.



OFFICE OF THE
MOKOKCHUNG TOWN CHUCHUYIMLANG
SENSO TELONGJEM
MOKOKCHUNG - 798601: NAGALAND
TENÜNGSANG AGÜTSÜR

Nagaland Staff Selection Board (NSSB), Clerical & Allied Service Examination (CASE) 2024 tatidang agiba nung Chuchuyimlang Kaketshir Telongjem Mokokchung nungi :-

1. Sb. Lemdongmeren

S/o. Mr. & Mrs. Kikümsüngba, LDA Cum Computer Assistant (District) State Taxes Department.



2. Kr. Aosangla C. Jamir

D/o. Dr.& Mrs. J. Chubatemsü Ao, LDA Cum Computer Assistant (Directorate) Nagaland State Transport.



3. Sb. Tongpaktoshi

S/o. Mr . Mrs. A. Imtikümsük, LDA Cum Computer Assistant (District) Works & Housing (NPWD)



Item Kaketshir lanurtem ajanga yimer yimsanger nem khonang takok tulu bener arutsü nung Mokokchung Town Chuchuyimlang Senso Telongjem ajanga tenüngsang aser tetushi tulu agütsür.

Tsüngremi nenok taküm aser wadang nübur asoshi takokma nung len aniangma.

Sd/-
T. YANGER PONGEN
President

Sd/-
M. TALILKR
General Secretary

Musk indang political party ya temenüñütsü mapa: Donald Trump

New Jersey, Chiteni/July 07 (Agencies): Elon Musk-i political party tasen ka tenzükbä ya temenüñütsü mapa lir ta tawa tashi pa tembar tajung süa alisang United States Tir Donald Trump-i aija mapang ka pa yarir tulutiba alisang den Republican mangatettep tamajungba akumer.

Alima nung takartisang Musk-i Department of Government Efficiency (DOGE) nung tekolakba mapa inyakdang Trump tena kodanga mepilatsü ama liasü, saka tiri bill tasen ka benokba ajanga tena kanga mejungi pila.

"Third party ka tenzüksü ya temenüñütsü mapa ama nibo bilemer," ta Trump-i par New Jersey golf club nungi Washington, DC bushia aotsü asoshi Air Force One nung mamen tsüngta osangbener dang ashi.

"Teti two-party system dang liasü, aser party tasembuba tenzükbä ajanga tali ang mangmangteptsü. Third party tem kodanga matalok. Anungji pa jangratemsü akok, saka nibo temenüñütsü ka amai bilemer," ta pai ashi.

South Africa nung asosang Musk-i US nung "one-party system" den tokteptsü asoshi America Party tenzüksü ta Honibarnü sangdonga liasü.

SpaceX aser Tesla CEO Musk-i ashiba agi, tir-i linük telungzük nung sen jenti indoktsü sentong aliba ajanga US sentsüh rongi aitsü, aser iba bill atema vote agütsüba ozüng yanglurtem akoktsü asoshi pa tashi nung aliba ajak inyaksü ta nangzük.

Taoba DOGE tekolakba, shiba lenisüba kübok federal sorkar sen indokba jenti anentsü aser mapa aika agientsü, pai domestic spending tsütsü Trump'er Republican aser Democrats ya sako lir ta ashir.

"Amajok nung sen indoka asen linük sentsü rongi idaktsüba nungbo asenok democracy masü one-party

system nung alir," ta Musk-i pa indang social media sapang X nung ashi.

Musk-i pa indang sentong tejangja kar dang lemsatep aser pai tentetba party ya US electoral authorities nung tenüng zülüok asü masüar mejangja, saka iba yagi 2026 midterm elections aser iba sülen Republicans tekolak menüdaktsütsü.

Trump-i Air Force One tayimtsü nung lia pa indang Truth Social network nung Musk maneni aija liasü.

"Elon Musk khenyongi lenmang alema aoba ngua ni kanga jashir, koba tesüiba hopta pongu tsüngta TRAIN WRECK ka akum," Trump-i ashi.

"Third Parties alibaji mepetmesü aser rongrongshirong adokdaktsüba nung dang junger, aser ajibo Radical Left Democrats nunga peria lir."

Electric vehicle company Tesla indang kibur asüba yong iba amala automobiles asoshi subsidies nung sen indokba ajemba yong Musk-i tir anema apusor ta Trump-i taoba mapang nungi jembia aruba nenshia ashi.

Musk-i anema nokdakba ya talisa US fiscal deficit aser sovereign debt timba kumdaktsüba bill mechi lir ta shijen ashir.

Deobarnep Treasury Secretary Scott Bessent-ia Musk-i yimtenren nung tetsüng ajemoktsü merangba aitsü aser pa indang company tem nung ang temulung agütsütsü shia liasü.

Musk indang sentong yagi Trump administration nung timtem agütsütsü asü, ta osangbeneri asüngdang dang, "Pa indang company balala nung boards of directors temi pa meyipa shilanga item company tem ketdang südaktsüner ama ni amanger, kong pa dang tajungba mali," ta Bessent-i langzü.

"Anungji item boards of directors temi yashi sangdongba maginüi alitsü südi

ta ni angateter aser pa dang yimten yimsüsüba nung masü saka pa indang business inyakyim nung rangloksü ajungshia alitsü."

Musk-i pa indang corporate maparen nung mapang ajak indoktsü asoshi May ita DOGE yutsü aser pa mapang tatsüka Trump indang inner circle nung alidang Tesla indang sales aser tenüng mejungi akum.

Trump-i pa den tepila sentong tuluka yimya balaka nung Oval Office nung ayongzük aser iba mapamng Musk nem tiri White House indang 'golden key' agüja liasü.

Ajisüaka anogo ishika dang lir Trump indang flagship spending bill Musk-i aitsüba sülen social media nung tena kati ka mezüngmeshitepa liasü.

Musk dang golden key meyipjang ta ashitsü asü, ta Trump dang Deobarnü asüngdangba nung pai telangzüba kecha magütsü.

Chinese Communist Party-i Xi melentsü lenmang bushir

Beijing, Chiteni/July 07 (Agencies): Chinese Communist Party (CCP) ajanga tejak tasen bushir, kechiaser parnoki Xi Jinping ya China linük tarutsü nung tashi ita alitsü atema tetsükdaktsü ka ama bilemer, ta itdangiter osang ka ajanga ashi.

CCP nung lenir tejentem Xi tangatetba aser international jenjang nung dangar kelakoktsüba nung mepelar ta osang ajanga ashi.

CCP-i China ya ideological isolation nungi piladakja temelenshi arudaktsüner, ta itdangiter osang ajanga ashir. Xi Jinping ya tanishir ka ama liaka, tamakok balala ajuruba ajanga pa khuret tali akumer.

Xi indang centralisation aser ideological campaigns ajanga CCP telungzük nung tongtipang telok tem jashiba osang ajanga sayur. Nisung ajak tanen makai ladanglarba ajanga China indang technology tamendak dak tashi ajema akumer aser institutional morale nunga tashi

meiti akumer, ta itdangiter temi bushitet. Li Shangfu aser Qin Gang ama pai tamang kateta aliba ketdangsür mapa nungi anentsüba ajanga party telungzük nung temulung melemtep tali akum. Xi indang ideological models yagi tangbo mapa manunger, ta CCP aser Party lenirtemi angateter, ta ashir.

General Zhang Youxia, First Vice Chairman of the Central Military Commission ya ola madoki People's Liberation Army (PLA) sülen chichiba tashi bena alir ka ama kumogo, ta itdangiter osang ajanga ashir.

Kibong tesendaktep mechi Xi Jinping sülen tashi anga anidaker ka ama mapang kabo repranga liasü, saka tangbo Zhang ya Xi medeni mitkar tashi abener amai kumogo, shiba Hu Jintao-Wen Jiabao era nungi CCP lenirtemi bhukuma nokdaker.

Zhang tali tashi taitba akumba ajanga CCP telungzük nung tashi

melenshiba sayur. CCP atema tebilemstü tulutibaji army tem 'stabilising institution' kumdaktsütsüba ya lir.

Rongsenketzüng tsütsü Wang Yang ya nübu tejangja ka lir, shiba taoba Vice Premeir aser reformist ka lir. Xi melentsü asoshi Wang ya tetemsü ta aikati repranger.

CCP ya tongtipang tejak ana lir - military aser economy. Parnoki General Zhang Youxia indang military professionalism ya Wang Yang tsütsü technocratic collaboration den lirumedemtsü nükjidong lir. Aser army tem Zhang tsütsü tejak meyipra, Ladakh, Taiwan aser South China Sea nung shilem tali agitsü aser timtem ajurutsü.

Wang Yang ya lenir akum nungbo, China-i rongsenketzüng tsütsü tesendaktep yanglushitsü aser rongsenketzüng aser arütsü tebilemstü jembishinütsü lenmang kar lapoktsü akok, ta itdangiter osang ajanga ashir.

Boxing : Ricky Hatton tanaben asayashitsü

Chiteni/July 7, 2025 (Agencies): Taoba mapang world champion Ricky Hatton-i pa asaya nungi anener aliba meyipa aruru asayatsü telemtetba agiba sangdongogo.

Manchester nungi Hatton, shiba October ita arishi küm 47 ajungtsü, pa United Arab Emirates nunger asayar Eisa Al Dah den December 2 nü Dubai nung middleweight bout ka asayatsü.

Asaya ayongertemi ashiba agi, iba tetoktepba ya professional bout ka asütsü, ajisüaka iba asaya ya Mike Tyson aser Jake Paul na asayaba ama asütsü asü masü mejangja, kong round tem mapang tatsüba aser round-a ishiba asaya liasü.

Hatton aser Marco Antonio Barrera na 2022 küm exhibition asaya ka asayaogo. Pa tatemsa professional bout ka 2012 küm Vyacheslav Senchenko den asaya, koba pai mekoki liasü.



Deobarnü Dubai nung Al Dah-i promote asüba show ka nung iba asaya indang ya sangdonga liasü, kong Hatton-i livestream ajanga pa meyipa aruru asayatsüba indang metetdaksü.

Hatton shibai welter-weight aser light-welter-weight nung world title benogo, pai pa Dubai nung iba sentong nung shilem

agitsü liasü saka pa indang sunglasses agi tenük yirutsüba sülen medentetsüsa aküm, ta ashi.

Hatton, shibai küm 15 asayaba mapang professional bouts 48 nung 45 koka liasü, pa tatemsa 2012 küm profession asaya ka nung asaya saka Senchenko makok.

Pai Russia nunger Kostya Tszyu aser Jose Luis Castillo na koka world title aben saka Floyd Mayweather aser Manny Pacquiao na mekoki liasü.

Arishi küm 46 tain Pacquiao-i, pa WBC welter-weight champion Mario Barrios den July 19 nü asayatsü ta May ita sangdongba süken tang Hatton-ia iba osang ya metetdaksüogo.

Arishi küm 46 tain Al Dah, shibai asaya 11 nungi ti koka lir, pa-a tatembangsa 2021 küm asaya. Iba asaya nung pa Mexico nunger asayar Pedro Alejandro Delgado-i koka liasü.

Ivan asaya nungi anisüngzüker

Chiteni/July 7, 2025 (Agencies): Taoba mapang Croatia nunger international asayar Ivan Rakitic-i pa arishi küm 37buba nung football asaya nungi anenba Hombarnü metetdaksüogo. Pa ya Sevilla aser Barcelona nungi kanga takok ngua asayaba ajanga ajaki jangja lir.

Social media ajanga Rakitic-i pa asaya nungi anenba osang lemsatepa liasü.

"Football nai ni pungmangba dang nungi tali agütsüogo. Nai medemer, emotions, tepela aser nüktzü ta ajak agütsüogo," ta pai zülutsü.

"Tang salem ashitsü mapang tongogo. Ni na nungi pila oaka na kodanga ni nungi pila maotsü. Ajak atema football dang kanga pelar," ta paisa zülutsü.

Rakitic Sevilla nungi asayaba mapang asaya 323 nung asaya aser iba mapang pai goal 53 idaksü aser assist 63 süja liasü. Parnoki UEFA Europa League ana akokba nung Croatia nunger asayar

yagi tongtibang shilem agia liasü.

Kasa mapang nung Barcelona-ia pa nem tetushi agüja, pa club nung asayaba mapang anguba takok marok agi meketbanger tangokba noksa ka lemsatepa liasü.

Rakitic ya FC Basel nungi asaya-a professional career tenzüker aser iba sülen Germany nung Schalke-i ao. Ajisüaka pa Barcelona nungi asayaba mapang temaba jenjang tongteta liasü, kong pai takok marok 16 angu. Barca nungi asayaba mapang takok anguba rongnung 2015 UEFA Champions League title abenba densema lir. Iba küm Juventus den final asayaba mapang Rakitic-ia goal idakja liasü. Pa Barca nungi 310 ben asaya aser iba mapang goal 36 idaksü.

International jenjang nung Rakitic ya Croatia team nungi 106 ben asayaogo aser iba mapang pa 2018 FIFA World Cup final nunga tetenzük nung asaya liasü. Ajisüaka parnoki France mekoki tanabuba jenjang nung tembang.

2buba Inter-School Badminton asayamung nung Rincho Academy-i takok tajung angu

Dimapur, Chiteni/July 6 (TYO): Chumoukedima District Badminton Association (CDBA)-i ayongzüka 2buba Inter-School Badminton Tournament kanga takok ngua asayaogo. Iba asayamung ya July 4 aser 5 nü Tetso Arena, Tetso College nung asaya liasü.

Asayamung nung school 24 nungi asayar 383-i arishi küm telemasa asaya balala nung shilem agia liasü.

Asayamung shibangba sentong nung Nagaland Badminton Association Vice President retired Chief Engineer aser tang NSSB, Government of Nagaland züngsem alakteta jaoker liasü.

O jembiba mapang Er. Ayemi-i, pa tajangshiba tem lemsatepba den lanur asayartem dang takok tashi tajungtiba asayatsü merangtsü ajungshia liasü.

Kasa mapang nung sentong nung UCO Bank indang Jorhat Zonal Office Chief Manager Amit Kumar tetushi tejaoker liasü.

Iba sentong ya Lungsi Zeliang aser Rongsen Ozukum na lenisüba nung agi aser Imtilong Lonkumer Chief Referee liasü. Sentong



nungsa Chekiye Village Baptist Church pastor Rev. Dr. Toniho Kiho-i sarasadem, CDBA Vice President Kvulo Lorin-i lokti pela agizükba o jembiba aser CDBA General Secretary Er. Khuvoyi Vese-i tepela o jembiba liasü. Sentong nung Nagaland Badminton Association Secretary Seyievizo-ia shilem agi.

Iba asayamung nung overall champion ji Rincho Academy liasü.

Category balala nung takok angurtem

Winners

Girls Doubles Under 17

1st: Sophia & Subenro (Hope Academy)

2nd: Lydia Shohe & KevidenoTepa (North Town HSS)

Boys Doubles Under 17

1st: Kikrunelie & Satemkaba (St. Francis De Sales HSS)

2nd: Aotangit & Vitsole (Hope Academy)

Girls Singles Under 17

1st: Subenro (Hope Academy)

2nd: Achano N.Humtsoe (St. Francis De Sales HSS)

Boys Singles Under 17

1st: Vitsole (Hope Academy)

2nd: Thejasetuo (St. Joseph HSS)

Girls Doubles Under 15

1st : Zachunglo Ezung & Bendangienla Jamir (St. Francis De Sales HSS)

2nd: Imkonglemla & Maching (Hope Academy)

Boys Doubles Under 15

1st: Khriemezo & Sera (Hope Academy)

2nd: HiloJishing & Lupe Shohe (DMI St. Joseph Global School)

Girls Singles Under 15

1st : Livana Yephtho (Rincho Academy)

2nd: Zachunglo Ezung (St. Francis De Sales HSS)

Boys Singles Under 15

1st: Khriemezo (Hope Academy)

2nd: Ishan Dutta (North Town HSS)

Girls Doubles Under 13

1st: Elilo & Illika Kibami (St. Francis De Sales HSS)

2nd: Honnym & Jumikoh (Hope Academy)

Boys Doubles Under 13

1st: Tsukho & Lyovei Veilou (Rincho Academy)

2nd: Athungbemo Murry & Tumbemo Tsopoe (St. Joseph HSS)

Girls Singles Under 13

1st: Livana Yephtho (Rincho Academy)

2nd: Honnym (Hope Academy)

Boys Singles Under 13

1st: Soukho Veilou

(Rincho Academy)

2nd: Athungbemo Muny (St. Joseph HSS)

Girls Doubles Under 11

1st: Kevisonuo Metha & Marsola Yinim Longkumer (Shalom Public School)

2nd: Loino Jimomi & Delphina Larka (St. Joseph School)

Boys Doubles Under 11

1st: Shepao & AkiviShohe (Rincho Academy)

2nd: Nibovi Shohe & Henmingou Singson (St. Joseph School)

Girls Singles Under 11

1st: Kevisonuo Metha (Shalom Public School)

2nd: Lichoi (Hope Academy)

Boys Singles Under 11

1st: Lyovei Veilou (Rincho Academy)

2nd: Sitho (Hope Academy)

Girls Singles Under 9

1st: Shonya (Hope Academy)

2nd: Sentiren (Hope Academy)

Boys Singles Under 9

1st: Shepao (Rincho Academy)

2nd: Misoonai Changkiri (St Savio HS School)

BILEMDANGANG

"Nü tebilemdangba memelenshi tashi na memelenshitettsü."